

Doxhanh Sam Nyied Sam

相约三月三

□ Yiz Ciz/余执

Sai: Gwnz bo baknya heu,
Biendah vareux hoengz,
Sam nyied sam daeuj daengz,
Naemj ra ngaenz doiqfwen.

Mbwk: Sam nyied sam daeuj daengz,
Mbanjcuengh saengz(maij) fwendoiq,
Dou dungxcaiz daiq noix,
Doiq mbouj deng gaej riu.

Sai: Mbouj heuh dou hix daengz,
Mbouj daengq dou hix daeuj,
Cin daengz mbwn bienq raeuj,
Raeuz doiqfwen doxlien.

Mbwk: Dwk fwendeiq doxdaeuj,
Fwen mbouj gyaeu hix hoiz,
Dou luenh fwen luenh doiq,
Hoiz mbouj deng gaej lwnh.

Sai: Hai fwengeiq doxdaeuj,
Vunz gvaqdaeuj hix haenh,
Sou fwen baenzlai haenq,
Maenh gvaq raeuz geij boix.

Mbwk: Dou fwen cix mbouj rox,
Gyoj cix gyoj mbouj deng,
Boekbienq lumj doxceng,
Dwgrenz lo youxnoix.

Sai: Sou fwen baenzlai rox,
Gyoj coenzcoenz cungj deng,
Dwk daeuj lumj lwglengz,
Ceng dou mboujrox doiq.

Mbwk: Dou fwen le mbouj baenz,
Dwg haemz lo youxdoq,
Ningznyiengh daeuj gangjgoj,
Dauq ndaej gyoj saek sauh.

Sai: Guhfwen coenzcoenz baenz,
Dwgcaengz maz le doq,
Sou heuh dou gangjgoj,
Vah bouxhoj nanz miz.

Mbwk: Coenz fwen geij bak naek,
Dou yied caek yied ngunh,
Sing sou baenzlai unq,
Dwk dou ngunhlinlin.

Sai: Coenz fwen geij bak naek,
Sou baez gyaeg couh ok,
Caeuq sou doengz baksok,
Sou doq okrwgrwg.

Mbwk: Coenz fwen geij bak gaen,
Dou cungj naemj mbouj ok,
Mboujdwg lumj daemjrok,
Dok geij baenz couh baenz.

Sai: Coenz fwen geij bak gaen,
Sou baez naemj cix ok,

Mbin daeuj lumj laep mok,
Lok daeuj lumj raemxrongz.

Mbwk: Coenz fwen geij bak naek,
Sou rox gyaeg rox baenq,
Coenz fwen geij bak gaen,
Dou raen laengxlele.

Sai: Coenz fwen sou caen naek,
Dou gyaeg hix mbouj baenz,
Dou dwg ukgyaeuj laen,
Baenz coenz mbouj yungzheih.

Mbwk: Sou rox ut rox euj,
Gveuj lumj geu cag vaiz,
Ciuq gyoengqsou dungxcaiz,
Dwk dou dailengngeng.

Sai: Mbouj rox ut rox euj ,
Gveuj gvaq vang gvaq raeh.
Saek coenz fwen mbouj bae,
Lauxsae vaiq daeuj coih.

Mbwk: Fwen sou baenzlai naek,
Caek he hix mbouj binh,
Fwen sou gokngingnging
Dwk dou in youh manh.

Sai: Mwngz naeuz fwen dou naek,
Caek he hix mbouj bienq,
Daeuj caeuj sou doiqfwen,
Dungx dou cienqlele.

Mbwk: Raeuz aeu caengh daeuj daep,
Fwen sou naek lumj rin,
Raeuz aeu vunz daeuj bingz,
Suenq sing sou leihhah.

Sai: Caiq aeu caengh daeuj daep,
Mbouj naek lumj coenz gim,
Caiq aeu vunz daeuj bingz,
Sing mbouj beij song youx.

Mbwk: Sing sou gokngingnging,
Dwk lumj rin yaek mbanq,
Sing sou daeujcancan,
Dwk lumj namh yaek sinz.

Sai: Sing dou mbouj baenz sing,
Vunz dingq hix raen fanz,
Daeuj lumj raemx gienghdan,
Sanq gvaq vang gvaq raeh.

Mbwk: Sing sou baenzlai gyuk,
Seuq lumj duk lumj gaeu,
Sing sou baenzlai gyaeu,
Dingq daeuj bouxboux haenh.

Sai: Rox dwg sou rox lai,
Dai dwg dou dai gonq,
Caeuq sou fwen doxgyonj,
Deng sou byonj dauqngangz.

Mbwk: Sou fwen baenzlai gyuk,
Rox hup(haep) caiq rox hai,
Fwen sou baenzneix lai,
Dwk dou dai roengz namh.

Sai: Fwen dou cix mbouj gyuk,
Mbouj rox ut geijlai,
Aenmingz naeuz bouxsai,
Gvai mboujgvaq mehmbwk.

Mbwk: Sing sou baenzlai swnh,
Dwk dou mwnh liuxnauq,
Bungz yienghneix lwglauq,
Sau gizlawz mbouj bai.

Sai: Sing fwen dou mbouj baenz,
Raen saetlaex liuxnauq,
Fwen dou sohngaungau,
Cauznauh sou song boux.

Mbwk: Fwen sou baenzlai unq,
Dwk dou mwnhlinlin,
Coenzcoenz dwk haeuj sim,
Dauq bae ninz mbouj ndaek.

Sai: Sing fwen ndangindingnding,
Vunz dingq hix dwglau,
Vwi(hemq) daengz lwgda hau,
Lwgsau bouxlawz haenh.

Mbwk: Ciuq gij sou dungxsaej,
Dou daejeq bae ranz,
Ciuq gij vah sou gangj,
Dou daimangq ngoenzcog.

Sai: Ciuq gij dou dungxsaej,
Bin mbouj ndaej hwnj sang,
Lumj gyoengqsou rox cang,
Luenh gangj yienghneix vah.

Mbwk: Cibngeih diuz gaeu heu,
Mbouj beij diuz gaeugat,
Geij cib boux daihhag,
Suenq fajbak sou baenz.

Sai: Cibngeih diuz gaeu heu,
Mbouj beij diuz gaeuvengi,
Aen guek geij cib sengj,
Genj ndaej sou leihhah.

Mbwk: Sou gangj yienghneix vah,
Dwk byadah hix caem,
Ciuq aen bak sou baenz,
Dwk byadaemz dai ngunh.

Sai: Dou gangj yienghneix vah,
Dwk byadah mbouj caem,
Lumj cungq nyingz roengz daemz,
Bya haeuj haenz mbouj youq.

Mbwk: Ciuq aen bak sou mbaeu,
Raeuz baenz byaek dwk lauz,

Fwen okdaeuj caucou,
Sau Namzningz nanz hoiz.

Sai: Ciuq gij vah dou gangj,
Mbangj deng mbangj mbouj deng,
Sou dingq raen dwgrenz,
Dou sim genxlele.

Mbwk: Ciuq aen bak sou mbaeu,
Dwk dou yaek ce mingh,
Ngoenzneix ndaej gyausing,
Ce mingh hawj mwngz dawz.

Sai: Ciuq gij vah dou gangj,
Mbouj ndaej hamj bae conq,
Vah dou gangj lonzdonz,
Sou onjsim daeuj dingq.

Mbwk: Ciuq gij vah sou gangj,
Dwk maeuzranz dauqdingq,
Ciuq gij vah sou gim,
Dwk rin rox byaij loh.

Sai: Ciuq gij vah dou gangj,
Mbouj mbanq hix mbouj sinz,
Ciuq gij vah dou gim,
Maningq hix mbouj lienh.

Mbwk: Ciuhgeq caen rox cauh,
Ciuhlaux caen rox cawq,
Guhfwen gawq cieq gawq,
Seizlawz cij doxbyag.

Sai: Raeuz fwen baenzlai ndei,
Lumj vameiz doxngaueh,
Sing fwen unqngaungaeu,
Naeuz doxbyag guh maz.

Mbwk: Mbouj byaij roen hix gyaeg,
Mbouj bae ngoenz hix haemh,
Guhfwen miz ngoenzlaeng,
Guhcaemz miz ngoenzcog.

Sai: Nanz ndaej daeuj doxraen,
Caen mbouj siengj doxbyag,
Sim raeuz heux baenz cag,
Byag bae nanz cuengq sim.

Mbwk: Byag mwngz baen liux youx,
It gou gouz it ing,
Byag mwngz bae liux gim,
It gonj rin it naengh.

Sai: Byag mwngz bae liux raz,
Doenghnaz duenh vunz byaij,
Byag mwngz bae liux gvai,
Doeknaiq yaek ce mingh.

Mbwk: Byag mwngz bae liux youx,
Dungx gou cieglinlin,
Langh song raeuz miz sin,
Cin daengz caiq doxhanh.